



Saunia e Bishop H. David Burton
Epikopo Pulefaamalumu

O Le Galuega Faapaia a le Uelefea

O le galuega o le tausia e le tasi o le isi ma le “agalelei atu i e matitiva” o se galuega o le faapaiaina, na poloa'i mai ai le Tama.

Talofa uso e ma tuafafine. I le 1897, sa tu ai le alii talavou o Tavita O. MaKei, i se faitotoa ma se tamaitusi i lona lima. A o avea ma se faifeautalaiti i Stirling, i Sikotilani, sa tele taimi na ia faia ai lenei mea muamua. Peitai, i lona aso, sa tatala atu ai e se olomatua vaivai le faitotoa ma tu atu i ona luma. Sa mataga ona ofu, ua maanuminumi ona alafau ma le ulu ve'uve'ua.

Sa ia aveina le tamaitusi na ofo atu e Elder MaKei, ma sa ia ta'u atu ni upu se ono e le galo lava ia [Elder MaKei]: “Mata e maua ai sa'u falaoa?”

Na tuua e lenei feiloaiga se uunaiiga malosi tumau i le faifeautalaiti talavou. Na ia tusia mulimuli ane, “Mai lava i lona taimi, na ou maua ai se malamalama loloto atu e faapea, e tatau i le Ekalesia a Keriso ona fiafia i le faaolataga faaletino o le tagata. Sa ou savali ese mai le faitotoa ma le lagona e faapea, o lona [fafine], faatasi ai ma . . . le oona matuitui i [lona] loto i le tagata ma le Atua, [sa] leai se foliga na te talia le feu o le talalelei. [Sa ia] manaomia le fesoasoani faaletino, ae sa leai se faalapotopotoga, i lo'u iloa i Stirling sa mafai ona tuuina atu ia te [ia].”¹

I le fiasefulu tausaga mulimuli ane, sa oi le lalolagi ona o le mamafatu o le Pau Tele o le Tamaoaiga. O le taimi lenei, i le aso 6 o Aperila, 1936, na faasilasila mai ai e Peresitene Heber J. Grant ma ona fesoasoani, o J. Reuben Clark ma Tavita O. MaKei, le mea na mulimuli ane lauiloa o le polokalama o le uelefea a le Ekalesia. E lua vaiaso mulimuli ane, ae tofia Elder Melvin J. Ballard e avea ma ona taitaifono muamua ma Harold B. Lee e avea ma uluai pule faatonusili.

Sa le o se taumafaiga faatauva'a lenei. E ui ina sa faatula'i mai e le Alii ni agaga ofoofogia e faautaitaina, ae na faamanino mai lava e Peresitene J. Reuben Clark e faapea “o le faatula'gaina o le polokalama o le [uelefea] o le taunuuga o se faaaliga mai le Agaga Paia ia Peresitene Grant, lea na tauaveina talu mai i le taimi o faaaliga tutusa na oo mai i le usoga sa nafa ma le tiutetauave.”²

O le tautinoga a taitai o le Ekalesia e faamama avega i mafatiaga o le tagata, sa mausali ma le maufesui'ia. Sa manao Peresitene Grant i “se faiga o le a aapa atu ai ma tausia tagata tusa lava po o le a le tau.” Fai mai a ia, o le a naunau lava tusa pe faia ai

se laasaga matautia o le “tapunia o seminare, tapuni le galuega faifeautalaiti mo se vaitaimi, pe tapuni ai foi ma malumalu, ae o le a latou le tuuina atu lava tagata e o matelaina.”³

Sa ou tu i autafa o Peresitene Gordon B. Hinckley i Managua, Nicaragua ina ua ia tulei saunoa i tagata e 1,300 o le Ekalesia sa aafia i se afa faataumaoui na uma ai le silia ma le 11,000 soifua. “A i ai lava punaoa a le Ekalesia,” na ia saunoa atu ai, “o le a matou le tuu atu lava outou e o matelaina pe leai ni lavalava, pe leai ni malutaga. O le a matou faia mea uma matou te mafaia e fesoasoani atu ai i le ala ua uma ona atofa mai e le Alii e faia ai.”⁴

O se tasi o uiga maoae o lenei taumafaiga e taulai i le Talalelei, o lona faamamafa lea i luga o le tiutetauave faaletagata lava ia ma le faalagolago ia te ia lava. Sa faamalamalama mai e Peresitene Marion G. Romney, “E tele polokalama ua faatuina e tagata e i ai o latou faamoemoega lelei, e fesoasoani ai ia i latou e le tagolima. Peitai, o le tele o nei polokalama ua mananuina ma se faamoemoega mo se taimi puupuu o le ‘fesoasoani i tagata,’ e ese mai i le ‘fesoasoani i tagata ina ia fesoasoani ia i latou lava.’”⁵

O le faalagolago o le tagata ia te ia lava o se fua lea o le ola faautauta ma le i ai o le amio-pulea faaletamaoaiga. Mai lava i le amataga, sa aoaoina ai e le Ekalesia ia aiga—e tatau ona nafa i latou—ma le tiutetauave i le mea sili latou te mafaia—mo lo latou lava soifua manuia faaletino. E manaomia i tupulaga uma ona aoaoina mo ia lava ia mataupu faavae o le faalagolago o le tagata ia te ia lava: aloese mai le aitalafu, faatino mataupu faavae o le faasoasoata tatau, saunia mo taimi o mafatiaga, faalogologo ma mulimuli i upu a perofeta soifua, atiina ae le atamai e iloa ai le eseese o mea e



manaomia ma le mana’o, ma ola e tusa ai ma na mataupu faavae.

O le faamoemoe, folafolaga, ma mataupu faavae e faamalosia ai la tatou galuega o le tausiga o e matitiva ma e le tagolima, e silia mamao atu ma tuaoi o le olaga nei. O lenei galuega paia ua le na ona faamanuaina ai i latou o e puapuagatia po o e le tagolima. I le avea ai o ni atalii ma afafine o le Atua, e le mafai ona tatou maua le fuataga atoa o le ola faavavau e aunoa ma lo tatou matua tuuina atu o i tatou atoatoa i le tausiga o le tasi ma le isi a o tatou i ai i lenei lalolagi. O loo i ai i le faatinoga ma le agalelei o le ositaulaga ma le ofoina atu o i tatou lava i isi tatou te iloa ai mataupu faavae faaselesitila ma le faapaiaga.⁶

Na aoao mai e le Tupu maoae o Peiniamina e faapea, o se tasi o mafuaaga tatou te foai atu ai a tatou mea i e matitiva ma auauna atu mo lo latou toomaga, ina ia mafai ai ona faatumauina se faamagaloga o a tatou agasala mai lea aso i lea aso ma savavali ma le le pona i luma o le Atua.⁷

Talu mai lava le faavaeina o le lalolagi, o lalagaina nuu amiotonu mai filo auro o le alofa moni. Tatou te naunau mo se lalolagi toafilemu ma ni nuu manuia. Tatou te tatalo mo ni nuu agalelei ma amiomama, lea e lafoa’i ese ai le amioleaga ae faatumauina mea lelei ma mea tonu. Po o le a le tele o malumalu tatou te fauina, po o le a le faatupulaia o o tatou tagata auai, po o le a le lelei o le vaai mai o le lalolagi

ia i tatou—ae afai tatou te le faia lenei poloaiga sili ma le taua e “fesoasoani i e ua vaivai, si’i a’e lima ua tautau, ma faamalolosia tulivae ua vaivai,”⁸ pe liliu ese o tatou loto mai ia i latou o e puapuagatia ma faanoanoa, ua i ai i tatou i le faasalaga ma e le mafai ona faamalieina ai le Alii⁹ ma o le a taumamao lava le fiafia ma le olioli mai o tatou loto.

I le lalolagi atoa, toetiiti atoa le 28,000 epikopo o loo sailia ē matitiva ina ia auauna atu i o latou manaoga. Ua fesoasoani i epikopo taitasi se aufono a le uarota e aofia ai taitai perisitua ma ausilali, ma se peresitene tuuto o le Aualofa. E mafai ona latou “faanatinati atu e fesoasoani i se tagata ese; . . . liligi atu le suauu i le loto mafatia o e faanoanoa; . . . [ma] soloia loimata o le tamaitiiti matuaoti ma faia ia fiafia le loto o se fafine ua oti lana tane.”¹⁰

Ua uunaia lelei loto o le au paia ma taitai o le Ekalesia, ma taiialaina e aoaoga faavae ma lagona faalelagi o tuaoi alolofa ma le agalelei.

Sa i ai se taitai perisitua i Amerika i Saute na mafatia ona o tagata matalaina ma le o maua ni mea e moomia, o si ana siteki laitiiti. Ona o lona le manao e pagatia le fanau i le fiaaai, o lea sa ia maua ai se fasi fanua e le o faaaogaina ma faatulagaina loa le au perisitua ina ia faato’a ma totoina. Sa latou maua se solofanua toeaina ma faapipii i ai se suotosina faatauvaa ma amata loa ona galueaiina le eleele. A o le’i mae’a, na tupu se faalavelave ma pe ai le solofanua toeaina.

Nai lo le tuuina o o latou uso ma tuafafine e mafatia i le fia aai, sa fusi e uso o le perisitua le suotosina tuai i o latou lava papatua ma tosoina i le eleele malō. Sa latou tauaveina moni lava i o latou lava luga le amo o mafatiaga ma avega a o latou uso ma tuafafine.¹¹

E i ai se mea na tupu i le talafaa-solopito o lo’u lava aiga na avea ma faataitaiga o le tautino atu e tausia i latou e le tagolima. E toatele ua faalogo i le tala i vaega o taavale tosolima a Uili ma Matini, ma le ala na mafatia ai nei paionia faamaoni ma maliliu ai, a o latou onosa’ia tulaga faataumaoui o le taumalulu i la latou malaga sopo i sisifo. O Robert Taylor Burton, o le tamā, o le tamā, o le tamā o lo’u tama, o se tasi o i latou sa faatonuina e Polika Iaga e o e lavea’i mai na Au Paia pele ma le atuatuvaale.

Na tusia e Tamamatua i lana api o talaaga e uiga i lea taimi, “Sa lolote le kiona ma matua’i malulu . . . sa matua’i malulu ua le mafai ona [matou] gaoioi. Sa i lalo ifo o le selo le

St. Catherine, Jamaica





fua o le malulu . . . ua matuai malulu ma ua le mafai ai ona feoa'i tagata."¹²

Sa tufatufa mea mo le faasaoina o le ola i le Au Paia sa pa'ulia, peitai "e ui i mea uma sa mafai ona [latou] faia, e toatele lava na maliliu ai i tafaala."¹³

A o malaga atu le Au Paia ua laveaiina i se vaega o le alasopo e ui atu i Echo Canyon, e tele taavaletoso sa faatafa ese ae fesoasoani i le fanau mai o se pepe teine. Sa iloa atu e Robert e lei lava ni lavalava o le tina talavou e faamafanafana ai lana pepe fou. E ui i le matuai tetele o le malulu, ae sa ia "tatala ese lona ofutino sa su'i i le fale ma tuu atu i le tina e [afifi] ai le pepe."¹⁴ Na faaigoa le pepe ia Echo—Echo Squires—e fai ma faamanatuga o le nofoaga ma tulaga o lona fanau mai.

I tausaga mulimuli na tofia ai Robert i le Au Epikopo Pulefaamalu-malu o le Ekalesia, lea na ia galue ai mo le silia ma le tolusefulu tausaga. I le 86 o ona tausaga, sa gasegase ai Robert Taylor Burton. Sa ia faapotopotoina lona aiga i tafatafa o lona moega, ma tuuina atu ia i latou lana faamanu-iaga mulimuli. I ana toe upu lava sa i ai se fautuaga faigofie lenei ae maoae: "Ia outou agalelei atu i e matitiva."¹⁵

Uso e ma tuafafine, tatou te faamamaluina na tamalii aoga na tofia e le Alii e faatulaga ma faatautaia le polokalama faatulagaina o le tuuina atu o le auunaga i tagata lē tagolima o

Lana Ekalesia. Tatou te faamamaluina i latou, o ē aapa atu i o tatou taimi i auala e le mafaitaulia ma e tele foi ina lē leoa e "agalelei atu ai i e matitiva," fafaga i e fia aai, faalavalava i e ua lē lavalavā, auuuna atu i e mama'i, ma asiasi atu i e ua saisaitia.

O le galuega paia lenei a le Faaola o loo faamoemoe e fai e Ona soo. O le galuega sa fiafia o Ia i ai, a o femaliuai ai o Ia i le lalolagi. O le galuega ua ou iloa o le a tatou maua atu o Ia o fai pe a na faapea o i ai o Ia ma i tatou i le taimi nei.¹⁶

Ua fitusefulu lima tausaga talu ai, ua tulai mai ai se faiga sa tuuto atu i le faaolataga faaleagaga ma le faaletino o tagata, mai se amataga faatauvaa. Talu mai lena taimi ua faaleleia ma faamanuina ai olaga o le fiasefulu miliona o tagata i le lalolagi atoa. O le fuafuaga faaperofeta o le uelefea, ua le na o se vaefaatatalaga manaia i le tala-faasolopito o le Ekalesia. O mataupu faavae o loo faavae ai, ua faamanino mai ai lo tatou faasinomaga o se nuu. O le fatu lea o lo tatou faasinomaga o ni soo taitoatasi o lo tatou Faaola ma le faaa'oa'o, o Iesu le Keriso.

O le galuega o le tausaga e le tasi o le isi ma le "agalelei atu i e matitiva" o se galuega o le faapaiaina, na poloai mai ai le Tama, ma ua mamaluina faalelagi e faamanuia ai, faaatoatoa, ma faaeaina ai Ana fanau. Ia tatou

mulimuli i le fautuaga a le Faaola i le faitulafono o i le faataoto i le Samaria Agalelei: "Alu, ma ia faapea ona faia"¹⁷ Ou te molimau atu ai i nei mea i le suafa o Iesu Keriso, amene. ■

FAAMATALAGA

1. *Aafiaga Faapelepele mai Tusiga a Peresitene Peresitene David O. McKay*, comp. Clare Middlemiss (1955), 189.
2. J. Reuben Clark Jr., "Testimony of Divine Origin of Welfare Plan," *Church News*, Aug. 8, 1951, 15; tagai foi Glen L. Rudd, *Pure Religion* (1995), 47.
3. Glen L. Rudd, *Pure Religion*, 34.
4. I le "President Hinckley Visits Hurricane Mitch Victims and Mid-Atlantic United States," *Ensign*, Feb. 1999, 74.
5. Marion G. Romney, "The Celestial Nature of Self-Reliance," *Liahona*, Mar. 2009, 15.
6. Tagai Mataupu Faavae ma Feagaiga 104:15–18; tagai foi Mataupu Faavae ma Feagaiga 105:2–3.
7. Tagai Mosaea 4:26–27.
8. Mataupu Faavae ma Feagaiga 81:5; tagai foi Mataiao 22:36–40.
9. Tagai Mataupu Faavae ma Feagaiga 104:18.
10. Joseph Smith, in *History of the Church*, 4:567–68.
11. Faatalanoaga ma Harold C. Brown, pule faatonusili sa i ai o le Matagaluega o le Tautua a le Uelefea.
12. Journal of Robert T. Burton, Church History Library, Salt Lake City, Nov. 2–6, 1856.
13. Robert Taylor Burton, in Janet Burton Seegmiller, "Be Kind to the Poor": *The Life Story of Robert Taylor Burton* (1988), 164.
14. Lenore Gunderson, in Jolene S. Allphin, *Tell My Story, Too*, tellmystorytoo.com/art_imagepages/image43.html.
15. Robert Taylor Burton, i le Seegmiller, "Be Kind to the Poor," 416.
16. Tagai Dieter F. Uchtdorf, "O Outou o O'u Lima," *Liahona*, Me 2010, 68–70, 75.
17. Luka 10:37.